

遜國忠紀卷之二

華陽周 鑣仲馭編次

吏部

尚書張統

張統字昭季陝西富平人父月川文行知名統洪武中舉明經爲東宮侍書才識通敏懿文太子器重之洪武十二年冬陞通政司左叅議試左通政十五年雲南平出爲右叅政陞辭

太祖賦詩二章賜之歷進左布政使統在雲南最久

凡土地貢賦法令條格祠祀公廨上下典儀經費
程度悉統裁定夷民孚悅遠邇奠安是時雲南寓
賢董倫王景韓宜可輩不問識不識皆厚恤之以
故遷謫至者如歸二十六年秩滿入 覲治行爲
天下第一特令吏部勿考賜璽書勞之曰曩者討
平西南夷命官撫守爾統實先往任今五年言出
則 聽服令布則四野懽忻皆由誠信相孚克
共乃職今年來朝不待考而朕知其功出乎天下
十二牧之首故嘉汝績復命仍治黔南汝往欽哉

賜宴及道里費 建文君立徵拜吏部尚書滇人
戀慕如失父母屬時更化旁求遺逸日集 闕下
率命統試鑑識精絕各當其材會修

太祖實錄被旨試翰林編纂官考第高下得楊士奇
策獨喜曰明達時務有用之材不但文詞之工也
奏第一授王府審理副士奇繇是著名後果大用
其知人如此壬午六月靖難兵至討奸黨統與焉
及

文皇卽位召統與戶部尚書王鈍諭曰卿二人久事

皇考習知典故今皆老矣其解職務月給尚書半俸
居京師視時政有戾舊制並向朕直言無隱庶稱
厚望老成之意統退遂自經於吏部之後堂死

西樵野記言張統少有學行尚氣節國初以人
材授部職建文時陞廣東布政使後 太宗登
極召回謂妻子曰吾荷 先帝之遇起自草野
一旦至此今大事已去惟一死可報耳卽沐浴
大慟投鍾山下龍潭死妻一妾二男女四亦隨
投之繼以婢僕數人慟哭云人而無義不死何

爲吾王公輩皆爲國亡予等獨不爲主人死乎
悉並投於淵以死按統以建文元年入爲吏部
尚書此云太宗召回非也喬世寧耀州志備載
統於 成祖卽位時自縊於吏部後堂以死絕
無投淵之說且言有子三人敵豆簞後敵舉懷
材仕四川按察司經歷相隨入水之事亦未嘗
有喬爲張鄉人言必有據野記真野人語耳

侍郎毛太

毛太不知何許人建文元年代王謙爲左侍郎而
張統爲尚書太文章政事皆優所與交者並中朝
俊彥靖難兵起數上封事條方畧張統死太亦死
或曰名太亨

戶部

侍郎卓敬

卓敬字惟恭浙江瑞安人後徙滄洲生而穎悟絕人讀書十行俱下一讀便棄去終亦不怠七歲與羣兒嬉有異人見之曰此兒骨髮殊異必爲名卿惜血不華色耳年十五就學寶香山性至孝定省之禮不以道遠廢嘗夜歸值大風雨迷失道得一兕牛馮之行比及門縱之則黑虎也洪武二十一年登進士除戶科給事中每上疏切直無所顧忌

或以太剛則折爲戒敬謝曰敬以寒微荷天子厚恩擢置諫官居其位則思直其道道苟直雖死不
可回也禍福豈所計哉時諸王在宮中服乘多僭
敬乘間白於

上曰宮中朝廷視效綱紀攸先今

陛下於諸王不早辨等威而使在宮中服飾有與

太子埒嫡庶相亂尊卑無序此舛道也何以令天

下

上笑曰爾言是吾慮未及此耳益器重之他日與同

官見適八十一人

上命改爲元士尋以六科爲政事本源又更爲源士
後復稱給事中陞宗人府經歷進戶部侍郎建文
初燕藩來朝敬密奏大略謂燕王智慮絕人酷似
先帝北平者強幹之地金元所由興也宜及今徙燕
封南昌羽翼旣剪變無從生萬一有之亦易控耳
夫萌而未動者幾也量時而爲者勢也勢非至剛
莫能斷幾非至明莫能察 建文帝覽奏大驚袖
以入翼日召見榻前曰燕王骨肉至親卿何言及

此敬曰楊廣隋文不尤親乎建文帝默然良久曰
卿休矣事竟寢俄而靖難師起悔不用敬言

文皇卽位敬以奸黨捕至

上見而訶之曰此小臣得非往日建議幾至搖朕者
乎爾何敢離間骨肉乃爾敬對曰先朝如從敬言
殿下豈得至此

上怒欲殺之而憐其才且繫獄命中人以管仲魏徵
事諷敬敬抗辭不聽先是姚廣孝每爲敬所輕銜
之切骨至是進言曰昔吳王不殺范蠡而蠡卒滅

吳王衍不殺石勒而勒終害衍人事有幾不可失
也夫南昌地居下流金陵加兵特探囊底物耳使
敬言若用

陛下寧有今日哉乃命殺敬敬臨刑從容歎曰變起
宗親略無經畫敬死有餘罪神色自若經日面如
生夷三族沒其家圖書數卷而已敬有高世之才
而未及大用立朝慷慨英偉多所建白美姿儀善
談論凡天文律曆地理兵刑之學靡不精究尤邃
性理爲文章峭拔磊落似其爲人詩詞宏婉有一

唱三嘆之遺音焉

文皇在藩邸雅聞其名其死也甚惜之曰國家養士三十餘年卓敬可謂不負其君者所著有遺書五十卷發明周子通書邵子經世之學別有詩文五十卷後侍講劉球傳其事謂與夷齊當並不朽私謚曰忠貞

侍郎盧迥

一作迥又作迪或曰盧拱

盧迥浙江仙居人建文三年爲戶部侍郎疎爽不屑曲謹然大節皎然少喜飲酒飲酣輒長歌人或謂迥狂旣仕顧折節恭慎靖難師入不屈縛就刑長謳而死聞者悲之

侍郎郭任

郭任鎮江丹徒人廉慎有吏才建文中官戶部侍郎主調兵食時朝廷用齊黃之策討諸藩之不靖者然後及燕郭任奏曰天下事先其本而後其末則易成除惡不去其本臣愚以爲迂也今日儲材粟備軍實果何爲者然而北討周南討湘舍其本而末是圖非策也且兵貴神速苟曠日持久銳氣旣竭姑息隨之所謂強弩之末不能穿繒縞將坐自困耳

文皇聞而惡之兵入金川門任不屈死之子經亦坐
死少子金山保戍廣西嘉靖中知府劉儲秀祀之
鄉賢祠

主事巨敬

巨敬陝西平涼人初爲監察御史抗直敢言建文
中改戶部主事清慎有聲靖難後被逮責問不屈
磔死夷其族

禮部

太子少保尚書陳廸

陳廸字景道寧國宣城人世居麻姑山西邨曾祖
巨卿元江州路總管祖宥賢 國初從征有功調
撫州守禦百戶因家焉父仲康嗣百戶廸幼儻
有志操洪武八年辟爲郡學訓導嘗代郡草 萬
壽表

上覽而異之十二年近臣以通經薦召爲翰林院編
修十八年陞侍講預修大典二十四年陞山東左

叅政捕蝗弭盜民德之二十七年丁內艱奪情起復辭不允二十八年陞雲南右布政使時普定曲靖烏撒烏蒙諸夷煽亂迪率土兵擊破之捷聞賜金幣三十一年 建文君卽位改官制定六部一品免尚書鄭沂等徵迪爲禮部尚書授特進榮祿大夫是時左布政張統已陞入吏部迪與之同輔政屬 朝廷方更修制度詔羣臣集議條奏沿革損益迪議居多建文二年知貢舉是年四方以水旱開迪奏請刑獄未清宜 刺法司擇公廉仁

厚者分詣郡縣審覈獄囚無令久淹致傷和氣又逃民家業旣喪且畏公私逋負失今不卹必嘯聚爲患宜使有司招徠其不願歸者聽附籍種田暫免差役則民安而盜息矣凡二十餘事皆從之尋加太子少保辭所兼俸不受靖難兵起與齊泰黃子澄上疏陳大計極論李景隆奸邪不可任軍權恐損國威時受 命督軍儲于外過家不入聞變卽赴京師

文皇已卽位召迪責問之迪抗聲指斥併收其子鳳

山丹山等六人同磔于市將刑鳳山呼曰父累我
廸叱勿言嫚罵不已命割鳳山等鼻舌食廸廸吐
之益肆詬詈比死不輟聲人于廸衣帶中得詩云
三受天王顧命新山河帶礪此絲綸千秋公論明
于日照徹區區不二心又有五噫歌並悲烈蒼頭
侯來保拾其遺骸歸葬邑計家僑有宗姻憤廸累
已扣其骨投諸河洪熙初詔釋廸親族戍者還鄉
給產成化壬寅郡人祀廸於鄉賢甲辰郡守涂觀
復於廸故居立祠祀之後漚廢嘉靖乙未吏部郎
李默謫判寧國復置祠專祀郡人私謚曰靖獻默
文學才行表著一時仕至吏部尚書兼翰林學士
丙辰春爲趙文華所誣逮詔獄卒

侍郎黃魁

黃魁不知何許人建文中爲禮部侍郎與陳迪黃
觀共事魁行古雅有文學習典禮迪觀敬愛之靖
難初不屈死

侍中掌尚寶司事黃觀

黃觀字瀾伯一字尚賓池州貴池人初從父贅姓許幼穎敏受學元翰林黃暉暉死節於元觀感奮以忠義自許嘗築翠微書舍讀書其間洪武庚午應貢入太學發解京府明年會試第一廷試對禦戎策以天道福善禍淫之機人事練兵講武之法爲言

尚皇嘉之擢狀元授官翰林修撰復黃姓歷尚寶司卿建文初遷禮部右侍郎屬定官制增左右侍中

員次尚書改觀爲禮部侍中與方孝孺等日見親
用靖難師起表請誅齊泰黃子澄以息兵觀草制
諷其散軍歸藩或束身謝 孝陵詞涉詆斥時北
兵已至中原明年渡淮觀奉 詔徵兵上游率諸
郡入援奮不顧家且行且募至安慶

文皇已過江矣下令諭京城左班文職奸臣罪狀觀
名列第六已而羣臣推戴

文皇卽位索寶不知所在或言黃觀取寶赴上游起
兵矣命收其家妻翁氏并二女給配象奴初觀駐

安慶聞金川門變痛哭謂人曰吾妻素有志節必
不辱越明日其家人自京逃來言狀是日翁持釵
釧佯使象奴出市酒殺遂携二女投通濟門橋下
死觀復痛哭至李陽河聞 建文君已遜位知事
不可爲會有朝使召觀觀給使者曰入賀新朝禮
當預習乃朝服東向再拜遂自投羅刹磯湍急處
舟人急鉤之僅得珠絲棕帽以獻命束芻象觀帽
之而剝于市籍其家并逮姻黨百餘人謫戍洪熙
初悉原之觀故宅在學宮西後清江龔守愚知貴

池卽其所立祠祀焉

兵部

尚書齊泰

齊泰應天溧水人初名德洪武二十年發解應天
明年舉進士歷禮兵部主事會雷震謹身殿

高皇禱郊廟泰以官九年無過得陪祀賜名泰三十
年擢兵部左侍郎明年進尚書嘗被召問邊將姓
名泰歷數無遺又問諸圖籍泰出袖中手冊以進
簡要詳密自是益承眷遇閏五月

高皇疾大漸將傳位 皇太孫泰受顧命輔之時諸

上自秦晉外皆尊屬擁兵專制地逼勢嫌秦恐一
日聞

高皇晏駕將爲窺伺或托奔喪爲名擁衆來京朝
廷不能制乃與太常卿黃子澄進議詔止諸王
哭臨本國所在吏民軍士悉聽朝廷節制詔
下諸王不悅謂此齊尚書聞我也

文皇時自燕入臨至淮安秦請上急出勅符勒歸
國疑隙益深嘗使北平北平原賂秦秦受而歸請
爲兵費上益倚重秦秦憤宗戚權重而朝廷

勢輕日思所以裁抑之乃與子澄畫策凡親王有
罪輒除國故周齊湘代岷相繼罪廢及靖難兵起
秦力主征討命將出師多其籌策上惟召學士
輩討論周官法度處便殿弄柔翰而已詔闔外
事一以付秦秦遂移檄指斥削屬籍或難之秦怒
曰名正言順敵乃可服北兵遂首以誅秦爲名上
疏請發奸臣齊秦黃子澄等與臣訊究陛下卽
不發臣必不休兵且抵京赤地千里時尚遣諸王
督諸軍秦以谷王穗漏師遁還慮遼寧二王近燕

爲變皆召之還寧王權與燕合謀不至惟遼王植
至遂留之天下勤王兵稍集始戰猶有勝負及兵
逼淮泗勢不可支 朝廷謫秦子澄官求解兵遣
李景隆致書於燕謂齊黃屏竄可息兵歸藩不聽
曰此緩我也進兵益急尋復召秦未及還金川門
開 建文君遜去秦追至廣德州欲往他郡起兵
興復竟被執見

文皇抗辭不屈死之從兄弟敬宗等皆死叔時永陽
彥等謫戍兒甫六歲給配後赦還今子孫猶存故

居爲舖舍人稱爲尚書舖云

仁宗時秦等宗親得放歸給產且戒天下無得以奸
黨相告訐嘉靖中知縣謝廷茵爲祠祀之

尚書鐵鉉

鐵鉉河南鄧州豐和鄉人洪武中繇國子生授禮
科給事中調五軍斷事奏對詳明

高廟嘉之賜字鼎石是時 朝政威神羣臣奔走奉
職救過不贍鉉獨以材能稱 上任使法司有疑
讞必以屬鉉有訴藩府人違法狀者下法司鞫治
數日未成獄更命鉉鞫之片時獄成由是益愛重
之未幾擢山東左叅政靖難師起曹國公李景隆
將諸道兵馬數十萬禦北師駐德州鉉督軍餉飛

輓芻粟水陸並進未嘗缺乏既以景隆軍敗南奔
鉉與叅幕高巍相遇于臨邑協謀定計收潰卒保
濟南城北師至圍城數匝百計亟攻屹不可破鉉
每出不意襲擊敵兵城攻壞者隨輒繕完時或以
藍布爲大幅界灰紋其上如甃石狀張布于外觀
之以葦蓆并力潛築北師遙望驚以爲神遂不敢
逼時或懸

太祖御像於城壞處兵畏忌矢石不敢犯鉉於像內
潛修築完固

文皇苦之又隄水灌城城中人恐鉉曰計且破之不
三日遁矣令登陴人皆哭呼曰旦日且降盡輟守
具出千人城外伏地請降復請退兵十里無驚動
城中人

文皇大喜下令退軍受降鉉懸鐵板城門上伏壯士
圍堵中約候入城呼千歲卽下鐵板拔橋乃遣人
請入撫諭

文皇渡橋直至城下城門開守陴者皆登城伏堵間
比入門門內羣呼千歲鐵板亟下傷

文皇馬首

文皇棄馬乘他馬走走至橋橋下伏兵斷橋橋不可動乃得過橋仍合兵圍城鉉令軍士噪罵北兵大怒攻至秋七月不克姚廣孝曰師老矣舍之南去有宋叅軍說鉉曰濟南天下之中北兵今南去其留守北平者皆老弱且永平保定雖叛諸郡縣堅守者多郭布政輩書生大叅公能出奇兵陸行抵真定南諸將潰逸者稍稍收合不數日可至北平其間豪傑有聞義而起者大叅公便宜部署號召

招徠之北平可破也北平破北兵回顧家室必散歸徐沛間素稱驍勇大叅公檄諸守臣倡集義勇俟北兵歸合南兵征進者晝夜躡之大叅公館穀北平休養士馬迎其至擊之彼腹背受敵大難旦夕平耳鉉以軍餉盡于德州城守三月士卒困甚而南將皆駑材無足恃莫若固守濟南牽北兵使江淮有備北兵不能越淮歸必道濟吾邀而擊之以逸待勞全勝計也乃設宴天心水面亭犒問辛苦述賦賡歌激發忠義北兵攻東昌鉉援之大戰

城下北兵敗

文皇得繇東北角潰圍出大將張玉戰沒事聞以却敵之賞賞鉉進布政使賜金幣誥命封三代如其官鉉入謝京師賜宴餽粟肉尋進兵部尚書佐大將軍歷城侯盛庸總天下兵壬午四月北師至宿州鉉監督諸將奮擊大破之于小河斬驍將王真中原震動

文皇欲北還諸將力陳楚漢成敗以諫于是決計南向再戰得大勝遂長驅渡江鉉感憤欲自裁及

文皇卽位鉉猶擁殘兵駐淮南規圖興復而大勢已去比購得鉉至背立庭中正言不屈令一顧終不可得割其耳鼻竟不肯顧爇其肉納鉉口中令啖之問曰甘否鉉厲聲曰忠臣義士肉有何不甘遂寸磔之至死猶喃喃詈不絕聲時十月十七日年三十七父仲名年八十三母薛並海南安置子福安年十二發河池編伍康安七歲鞍轡局充匠尋皆戮死

侍郎陳植

陳植廬江人元至正間舉河南鄉試不仕洪武間起爲吏部文選司主事歷官兵部侍郎靖難兵至植受命督師拒于江上麾下洶洶密議迎降植以大義責之誓死固守都督金某遂殺植率衆倒戈自陳邀賞

文皇立誅之因獎植具棺斂遣兵護喪葬于白石山麓植宗人懼皆變姓名走匿無敢會葬者

侍郎邊昇

邊昇河南滎澤人洪武中以明經薦累官兵部侍郎有氣節靖難師渡江昇率兵拒之殊死戰被獲語不屈而死

侍郎徐屋

徐屋字宗實浙江黃巖人洪武中應聘赴闕

高皇嘉其通達治體授風紀官屋自以草茅愚孱辭授銅陵簿謫淮陰驛丞郡邑士子依之多所造就召見獎諭屢聘主文衡陞蘇州通判擢兵部右侍郎疏請移整風俗罷去不急振舉廢墜裁定賦稅撫安農業開政教之路塞異端之源進賢退不肖等事皆切時要北師起奉使招集兩浙義勇文皇卽位屋家覆沒于京師屋遁去杜門終老

主事樊士信

樊士信湖廣應城人洪武十八年進士建文中以兵部主事守淮河北兵南下士信禦之力不支遂死後夷其族

刑部

尚書侯泰

侯泰順德南和人累官刑部尚書靖難兵起泰主
抗禦之策時督餉山東濟寧不守輜船陷沒還京
建文四年又出淮安總軍餉得便宜行事經畫苦
心嘗徹旦不寐及官兵數敗京師告急泰赴闕
行過高郵與其隸上高縣人茅印仔同執下錦衣
獄泰不屈死之弟敬祖子玘皆論死籍其家幼子
京兒永樂九年尚繫錦衣獄

尚書暴昭

暴昭山西人洪武時累官刑部侍郎建文初克北平採訪使甫至境聞變亟走歸聞上已北平爲燕所據廼開設平燕布政司于真定陞昭刑部尚書掌司事平安諸兵敗召還京及金川門失守出亡被執見

文皇抗罵不屈去齒截手足猶罵不絕口斷頸乃已

侍郎張昺

張昺山西澤州人洪武中舉人才累官刑部左侍郎建文君初卽位諸大臣言藩王周齊湘代岷谷相繼變告藩國所在宜簡精強謀略有威望者爲守臣彈壓之乃以昺出掌北平布政司事與謝貴並受密命至則伺燕府動靜知

文皇必起兵遂集在城七衛屯兵部署九門防守飛章奏聞先是昺以司吏李友直幹敏引寄腹心令訶府中事友直輒先事泄昺謀并密竊其章以獻

燕府

文皇乃稱疾不出長史葛誠言王無恙曷不信張玉
朱能請

文皇起兵

文皇曰曷貴已先發非計擒二人不可建文元年七
月六日會 朝廷遣人逮府中官校

文皇盡縛置庭中召曷貴入與械去曷以爲

文皇窘不得已故也防守遂懈二人入端禮門門內
伏兵起千戶譚淵遂縛二人

文皇擲杖起立曰我何病爲爾輩所迫耳曷不服死
之壬午六月

文皇卽位族曷家近戚程亨輩皆生焚之疎屬及里
人並戍邊有一子得避脫不知所終

文皇屢夢曷被髮爲厲命斲曷棺焚其屍面色如生
洪熙初 詔曷戚屬戍邊者家籍一人餘縱之歸
正德十五年知州馬汝驥立祠祀

侍郎胡子昭

一作子韶字伯尚

胡子昭字仲常四川大足人初名志高富經術性方介方孝孺爲漢中教授子昭往從學蜀獻王賦詩贈之後以明經儒士薦爲榮縣訓導建文初陞翰林檢討又陞山東按察僉事進刑部左侍郎

文皇卽位被逮死之臨刑有詩曰兩間正氣歸泉壤一點丹心在帝鄉時年四十一父復初母郭皆年八十餘并其子五人給緝繼等皆謫戍正德中巡按御史熊相立祠祀焉

侍郎金有聲

金有聲河南人累官至刑部侍郎建文四年奉命與黃觀張顯宗王叔英等徵兵江西等處有指揮常州朱進隨行六月被南昌左衛百戶劉恩縛送京不屈死并族其家

郎中柳一景

柳一景湖廣人累官刑部郎中京師未陷與太學生王志請殺李景隆不聽遁去居浙東臨海東湖上日負柴入市口不二價建文壬午秋詔至臨海湖上人相率走縣庭聽詔或歸語樵夫曰新皇帝登極矣兩樵夫愕然皇帝安在或曰燒宮自焚矣兩樵夫相抱慟哭遂投湖水中死

按此卽相傳爲東湖樵夫者也逸其姓氏久矣然史仲彬致身錄又云牛景先稱東湖樵而高

賁亨東湖樵夫傳與鄭曉遜國臣記並無兩樵夫之說則何以故豈諸公遜迹詭托間有同轍乎抑世遠莫憑尚屬後之人遙揣也耶余爲循拊滕錄所載列姓氏於此仍別著東湖樵夫傳於後

主事徐子權

徐子權江西新淦人今分屬峽江洪武乙丑進士爲刑部主事靖難師至聞練子寧死慟哭賦詩有翹首謝京國飛魂返故鄉之句自經死

主事劉原弼

劉原弼字良輔河南開封府扶溝縣人洪武中以
貢任刑部主事靖難兵入京城原弼率家人巷戰
遇害死索遺骸不可得其家刻木爲人葬之裔孫
自強萬曆初仕至刑部尚書自強子懋武雲南潯
江府知府父子所至有治蹟以忠孝世其家云

工部

尚書徐貞

徐貞陝西人建文中爲工部尚書京師陷宮中火起帝出亡貞留之信宿事覺被誅并族餘一女年止十三歲俾屬樂籍其樂官陳儀者陰養其女不令汙玷洪熙初遇赦儀擇嫁良家尚處子也儀爲娼籍而能執義如此

郎中韓節

韓節揚州人建文四年爲工部主事尋陞本部郎中會金川門破節倉惶爲亂軍所殺

郎中張安國

張安國浙江定海人建文中爲工部郎壬午燕兵
迫京師國謂妻賈氏曰大事去矣無能爲也况予
卑職又非司馬旣不能帥兵應敵又不能羔膝以
事人奈何賈氏曰盍隱諸國曰然乃與其妻乘舟
入太湖忽聞人說京師陷帝自焚國大慟語妻
曰食人之祿而存身於新主之世恥莫大焉乃鑿
其舟以沈

遜國忠紀卷之三

華陽周 鑣仲馭編次

御史府

御史大夫練子寧

練子寧名安以字行江西新淦人父伯尚洪武間
爲起居注以直言忤旨出爲廣德州同知遷臨
汀鎮安二府通判卒於官子寧少英敏不凡從鄉
長者竹庄先生遊命賦水竹村居詩有千山暮雨
石泉通一夜春雷長籜龍之句竹庄大異之稍長

與金幼孜相友善謂之曰異日子必爲良臣我必爲忠臣洪武甲子舉於鄉明年登會試廷對極言朝廷近日用人徇名而不求實小善驟進小過輒戮因歷陳古人教養任用之道甚剴切

高皇嘉之擢第二授翰林修撰子寧益以名節自砥礪由是聲望蔚然中外咸以文學行誼稱之尋丁母憂杜門屏跡力行喪禮服闋復除翰林陞副都御史工部侍郎建文改元調吏部左侍郎以賢否進退爲已任多所建白與方孝孺特見信用庚辰

罷都察院典刑獄改爲御史府如唐宋御史臺故事職專糾察迺拜御史大夫北師起子寧與卓敬等畫策防禦極論曹國公李景隆姦邪懷異志賣國喪師及召還子寧執景隆於朝數之曰景隆以功臣子兼至戚爲上公奉命出師朝廷何負於汝汝乃敢謀叛奸邪不忠請速誅之不聽憤激大呼曰賣陛下者必此賊臣備員執法不能摧奸請先伏誅建文君不憚靖難兵旣渡淮中外震恐靖江王府長史蕭用道衡府紀善周是修上

書論大計指斥用事者誤國書下廷臣及兩人議用事者怒詬兩人子寧從旁沮之曰禍難日迫我輩謀國之臣實尸其咎事已至此尚不容言者乎詬者愧而止

文皇卽位臨安指揮劉傑縛子寧至李景隆以前憾請誅之及責問子寧語不遜斷其舌曰吾欲效周公輔成王子寧手探舌血大書地上成王安在遂族其家姻戚被逮論死者百五十一人戍邊者又數百人越數年吉水錢習禮以未逮官中朝恒爲

鄉人所持心懷憂懼以告學士楊榮榮乘間以聞文皇欣然曰使練子寧尚在朕固當用之况習禮乎卽日下令禁止方孝孺嘗稱子寧多學而文後同知王佐緝其遺文序而名之曰金川玉屑正德中提學副使李夢陽始命有司梓之立祠祀其父子嘉靖元年以流賊亂割淦之半分設峽江練氏故居三洲寔隸峽峽人請祀子寧淦人與之爭知府錢琦議兩祀之萬曆改元

詔卹錄諸臣苗裔先是子寧妾秦氏有身生子戍所

名曰善慶洪熙初放還後胤僅有存者知縣黃尚質索得一人匿他氏家復其姓俾主祀事

御史大夫景清

景清本耿姓報籍訛爲景陝西真寧人倜儻尚大節洪武中領鄉薦遊太學同舍生有秘書清求觀不與固請約明日卽還生旦往索清曰吾不知何書亦未嘗假書於汝生忿訟于祭酒清卽持所假書往見曰此清素所業書卽背誦徹卷及問生生不能對一辭祭酒叱生退清出卽以書還生日吾以子珍秘太甚特相戲耳初清赴舉時道淳化主家女爲妖所憑清宿其家是夜妖不至去却復來

女詰之曰避景秀才耳女以告其父父追及清道
所以清書景清在此四字令歸粘於戶妖遂絕甲
戊試禮部爲第三錄詩書二經對大廷 賜第二
入翰林三載改監察御史丁丑春 召見嘉其材
命署都察院左僉都御史與實俸是夏臺臣鄧文
鑑劉觀及清奏事罷以疏事訛懷印入刑科更疏
爲給事中劾下 詔獄尋宥之出川陝巡察私茶
建文初進左都御史改御史大夫
文皇繼統方孝孺練子寧等皆死而清委蛇侍朝人

疑之一日早朝清緋衣入先是

文皇夜夢緋衣人挾刃圖不軌占者又奏文曲星犯
帝座甚急

文皇因疑清及朝清獨衣緋命收之得匕首于清懷
中詰責之曰欲爲故主報仇直立嫚罵不屈命抉
其齒舌且抉且罵頃之近前若有所啟則含血直
嚙御袍乃命醢其肉以草實皮械繫長安門是夕
精英迭見晨 駕過清所忽索自斷屍前二二步
若欲犯駕狀乃藏之庫中已而

文皇晝寢夢清仗劍追繞御座覺曰清猶爲厲邪命
夷其族籍其鄉轉相攀死謂之瓜藤抄村里爲墟

副都御史茅大方

一作芳

茅大方揚州太興人博學能詩文少有奇名嘗謁
孟廟有千古難亡義利詞之句一時作者皆遜服
父友嘉興陳堯道嘗贈之詩曰陸機此日能爲賦
賈誼何年復獻書洪武中以儒士應辟典教淮南
考績入朝

高皇召對悅之擢秦府長史出制詞褒美勉以董子
輔相之業賜賚甚寵大方感激在王左右諫諍彌
縫得大臣體自揭其堂曰希董以彰 聖訓且著

其志焉方孝孺爲記稱其志意偉然敦大和雅不
亢不諂深得正誼明道之旨建文中累擢右副都
御史靖難師起憤國命口蹙遺詩淮南守將梅殷
曰幽燕消息近如何聞道將軍志不磨縱有火龍
翻地軸莫教鐵騎過天河關中事業蕭丞相塞外
功勛馬伏波老我不才無補報臨風一歎一長歌
慷慨激烈聞者壯之時北兵初起爲鐵鉉所拒尚
未渡淮也

文皇卽位被執不屈與其子順童道壽同日戮死永
樂四年十二月幼子文生亦誅焉二孫添孫歸生
死獄中遺文五卷後郡人尚書儲懽輯之名曰希
董遺集

副都御史陳性善

陳性善名復初以字行浙江山陰人洪武十八年進士臚唱過御前

高廟見其容止凝重屬目久之曰性善君子人也授行人司副已而入翰林爲檢討初誠意伯劉基卒上遣御史李鐸往取其遺書基子璉出書於石室中從鐸詣闕上之召善楷書者入便殿繕錄性善與焉屬

上威嚴進見者人人惴恐或惶汗不成一字性善動

止安雅書法妍正

上嘉悅賜以酒是時怒譴叵測性善留竟日家人以爲死矣比出大驚喜久之超拜禮部左侍郎薦達薛正言輩前雲南布政司韓宜可方隸謫亦以性善言起爲副都御史 皇太孫在東宮時已熟性善名及卽位一日退朝獨召性善賜坐問治天下之要且使手書以進性善感知遇盡所欲言

朝廷悉從之然施行未竟輒爲權奸所尼性善請見曰 陛下不以臣愚猥承顧問臣旣僭塵上聽許臣必行未幾輒改所謂爲法自戾何以信天下建文帝爲之動容北師南下改性善副都御史監軍戰靈壁敗績性善與大理丞彭與明欽天監副劉伯完指揮王資皆被執旋縱遣之性善愧忿衣朝服躍馬入於河以死

文皇卽位追戮之家徙邊後赦還

僉都御史周璿

周璿青州諸城人建文初以神策衛經歷言事擢左僉都御史靖難後不屈死之妻王氏子蠻兒永樂中猶繫獄

僉都御史司中

司中未詳何許人洪武二十九年以監察御史署
都察院三十年擢左僉都御史靖難時以黨論死

巡撫都御史黃清

黃清未詳何許人相傳建文時巡撫某地

文皇卽位詔至清立拒之其下皆用命欲興兵力寡
被擒論死

監察御史魯鳳韶

魯鳳韶江西廬陵人洪武末登進士建文中爲監察御史會藩王來朝從御道馳入且不拜鳳韶抗章劾之言殿上宜展君臣之禮官中乃敘叔姪之倫今桀傲不恭亂法制非

太祖意 建文君曰至親勿問靖難兵起朝議遣使持 詔諭解兵羣臣無敢行者鳳韶毅然請行至軍前不納鳳韶取竹通節入 詔鼓風達之不報而還靖難後以原官召不至尋加吏部侍郎召亦

通國忠節 卷三
不至乃刺血書憤詞於襟上曰予生廬陵忠節之
邦素負骨鯁之腸讀書而登進士第仕宦而至繡
衣郎旣一死之得宜可以含笑于地下而不愧吾
文天祥屬妻李子公望曰我死勿易衣殮遂自殺
時年二十九李亦自縊死

監察御史董鏞

一作庸

董鏞不知所自起亦不知何許人建文時爲監察
御史諸御史中有氣節効忠 本朝者時時會鏞
所誓不負此心將校懷二心不力戰者輒露章効
之靖難後爲衆所持謂鏞逆黨論死家戍邊

監察御史王度

王度字子中廣東歸善人少力學通經史能文章
爲鄉里師洪武中以明經薦爲山東道御史糾繩
不避權要疏十餘上多見采行北兵起度與齊黃
等調兵食建文二年監會試時李景隆累敗退保
濟寧以盛庸代之度密陳便宜有東昌之捷及徵
景隆還不誅反用事忌庸併讒度度稍踈斥靖難
兵南下益急度請募兵有小河之捷勅度勞軍
徐州比還鳳陽失守方孝孺與度書誓死社稷京

師事定坐黨戍賀縣千戶所以出語不遜論死夷
其族時年四十七

監察御史魏冕

一作公冕

魏冕江西吉安永豐人建文時爲監察御史勁直
有才名靖難兵至有約開門迎納者冕與大理寺
丞鄒瑾率同僚十八人卽殿前毆之幾死會輟朝
大呼請速加誅臣等義不與此賊同生不聽明日
宮中火起或謂冕宜急迎附冕厲聲曰使吾改臣
節明君亦所不用奈何徒自壞也靖難後冕自殺
法官請追罪夷其族

監察御史甘霖

甘霖安慶懷寧人洪武丁卯鄉薦爲監察御史剛正敢言中臺推重之靖難後被執抗言求死從容就戮子孫相戒不復求仕正德中知府胡纘宗祀之鄉賢祠

監察御史高翔

高翔陝西朝邑人有文學矜名節洪武中以明經徵爲監察御史所論奏皆國家機要

上多納之建文時尤戮力戎事相與激發忠義

文皇素聞翔名卽位後召翔將大用之翔持喪服入見大哭語又不遜乃命殺之沒產夷族諸給高氏產者皆加稅曰令世世罵翔也親戚悉戍邊又發其先墓雜犬馬骨焚灰揚之而以其地爲漏澤園

監察御史王彬

王彬字文質兖州東平人洪武中進士爲御史巡
淮揚靖難兵至彬與指揮崇剛共守揚城指揮王
禮欲舉城降彬與剛知之執禮及其黨繫獄彬外
禦內防七日不解甲有力士能舉千斤彬常以自
隨靖難兵飛書城中有縛王御史降者官三品左
右憚力士莫敢縛禮弟崇厚賂力士母誘其子出
會彬解甲浴崇與千戶徐政張勝率舍人吳麟等
數十人排門入縛彬昇至城上投靖難兵中不屈

死之政遂出禮等于獄與江都知縣張本開城門
降正德中揚州祀彬名宦

監察御史鄭公智

鄭公智字叔貞浙江寧海人力學好古工文詞方
孝孺薦之蜀獻王召至成都王與語經史論詞藝
公智數稱述河間東平賢行王說之建文初從孝
孺至京舉賢良爲監察御史吏事精敏持法不阿
靖難後坐方黨論死

監察御史王玘

王玘蘇州人爲監察御史永樂初匿革除奸黨子
孫坐黨論死

監察御史謝昇

謝昇徐州沛縣人建文時爲湖廣道御史練兵給
餉夙夜効力靖難後不屈死之父旺子咬兒謫戍
金齒

監察御史韓郁

韓郁未詳何許人爲監察御史建文中上書言諸王親則

太祖遺體貴則 孝康皇帝手足尊則 陛下叔父使 二帝在天之靈子孫爲天子而弟與子遭殘戮其心安乎此皆監儒偏見病藩封太重疑慮太深故至此夫唇亡齒寒人人自危周王旣廢湘王自焚代府被推而齊臣又告王反矣爲計者必曰兵不舉則禍必加是 朝廷執政激之使然燕舉

兵兩月矣前後調兵不下五十餘萬一矢亡獲謂
之國有謀臣可乎經營已久軍興輒乏將不効謀
士不効力徒使中原無辜赤子困于轉輸九重之
憂方深而帷幄與國事者方且洋洋自得彼其勸
陛下必削藩國者果何心哉諺曰親者割之不斷疎
者續之不堅陛下不察不待十年悔無及矣臣
至愚感恩至厚不敢不言幸垂洞鑒興滅繼絕釋
代王之囚植湘王之墓還周王於京師迎楚蜀爲
周公俾其各命世子持書勸燕罷兵守藩以慰宗
不聽

廟之靈明詔天下撥亂反正篤厚親親宗社幸甚
文皇卽位郁遁去不知所終

監察御史丁志方

丁志方山東聊城人洪武乙丑進士繇吳橋知縣擢監察御史靖難兵逼京城謂妻韓曰師至城必克吾惟一死報國汝其携幼子潛歸撫之以延丁氏後及兵入被執不屈死之子賢甫十歲易姓爲龐孫毅中成化丁酉鄉試始復其姓

左拾遺

戴德彞

戴德彞浙江奉化人洪武二十七年進士第三人授翰林編修三十年與張信並陞侍讀

高皇諭之曰官翰林者雖以論思爲職然旣列近侍旦夕在朕左右凡國家政治得失生民利害當知無不言昔唐陸贄崔羣李絳在翰林皆能正言讜論補益當時顯聞後世爾盍以古人自期德彞感憤思所以稱

上意直聲震於朝改監察御史益善其職建文中省
御史改左拾遺北師南迫與齊黃等日夕謀畫防
禦

文皇卽位逮至責問不屈死邑人立忠烈祠祀之